

青山集卷第八

當塗郭

祥正字功父

楚詞體二十首

補到難 并序

真陽有山削立出江上陰翳其外軒豁其內名爲碧落洞天唐周夔羽皇題文命曰到難言其去中國之遠而賢士大夫之所難到也詞則麗矣然未能盡碧落之狀予取其言而補之題曰補到難篇云

到乎難哉碧落之洞天上有嵐壁之瑤局下有澄溪之碧瀾碧瀾之下寸寸秋色日窺之而可量手搴之

而莫得窺容光而練飛巖漬陰而乳滴如長人如巨
虵如翔龍如鑞錒如倒植之蓮如已剖之瓜如觸邪
之獬豸如蝮月之蝦蟇或斷而卧或起而立或欲闔
而搏或驚顧而呀若斯石也吁可恠耶何詭絕之異
觀嘗置之於幽遐到乎難哉長蘿羨秀瘦木竦直香
櫻寒而自媚名槩詢而鮮識煙霏霏而引素雲悠悠
而奮翼亟模似其變態已滅然而無迹崩漸遠響聲
落瑟續聆之愈深詠之不足欲幽棲而忘返尚徘徊
而眷祿彼寧待乎世人蓋有要於仙躅到乎難哉信
夫到之難也匪到之難知樂此以爲難知樂此矣能

以處之又爲難余故補到難以題篇些

巫山送吳延之出宰巫山

送子之邑兮山之峩峩繫物之可賦兮曰如之何虛
徐悅耀兮匪車匪馬匪足匪翼兮奮于巖阿薄萬象
兮周四海爛五采兮揚天波倏然悄然以自歛安輕
素兮縈翠螺容與兮窈窕行止兮委蛇吐兮若英攢
兮若葩聚若白蟻散若楊花爰有靈依兮遂異于他
對之自然又不可求逐之無迹愴我離憂上下無窮
變化周流亂曰緜延夭矯兮竟何補贊天工兮濡厚
土舒則有時兮卷則有所不爲神女兮而爲君子

山中

風蕭蕭兮雲靄靄泉淙淙兮石皚皚禽驚人兮遠飛
去以復還客醉其間兮殊不知為冠帶髮被衣頽以自
顧兮誰為吾仇山花為我一笑兮山草為我以忘憂嗟
世人之愚兮竟營營以何求求百年之寵榮兮取萬
世之奴囚怵讒舌之甚兮尚毀孔而謗周咄何得而
何失兮孰為馬而為牛歌數作兮飲未休石駭以走
兮泉凝而不流起挽石以道泉兮爾何我叛吾將去
乎世兮結爾以長年之遊

招遯

遯兮樂歟吾能為子言之山高水長兮遯歲月而忘
歸朝採木兮遯而食暮葺蓑兮遯而衣雲徜徉兮出
岫奮吾心兮與期日躅躅兮行天吊吾影兮沉西委
吾形兮自信豈塗檢之詰曲兮能屈伸而驚馳遯其
樂兮吾能為子重言之林之深則鳥獸遯而樂水之
深則魚龍遯而樂帝者之道備則生民遯而樂遯將
獨樂乎哉吾弗與也於是作招遯之辭辭曰來音來
馬肥馭良兮遲子以歸虎豹齧人兮胡獨為宜朝有
好爵兮廩有好祿遯勿遯兮于斯之時

言歸

休歟歸乎何為而言哉予七齡而孤兮託慈育以苟
生挺手以筆兮口授以經緒先子之素訓兮夜未央
而丁寧既束髮以就學兮入必問其與游聞道之進
兮曰使我以忘憂課蠶而織兮紉衣以先汝使弗墜
業兮我勞而汝處慨薄德之眇末兮今逾壯而不揚
吾母老矣兮戀故鄉雖得邑而祿兮曾寤寐之弗違與
音問之吉兮孰若朝夕而在傍誰繫予足兮眷白雲
之徜徉還印綬於有司兮賢守足以往訐將俟代而
返兮念歲月之去暮休歟歸乎春山巍巍春水瀾瀾
春蒲濯濯春魚尾尾吾親在前吾子在後飲甘滌潔
以介眉壽

廣言歸

予將歸兮而有言德眇薄兮言弗見信音孝乎為孝
兮友于弟舅奚為為政兮予之所存慨日月兮往而
不返吾親八十兮事之去晚朝廷清明兮予忠曷施
道弗行於家兮何以教吾民之為哉嗚呼耕吾土兮
足以食條吾桑兮足以衣予奉親兮孰不可樂予治
身兮尤以為宜寒何憂兮何思恬無悶兮無知休歟
歸乎以退為進乎予發諸誠乎賢誰弗信乎

泛江

歲在庚子月惟孟冬寒予職事鼓楫長江感慨其懷
而爲之辭去士有以處兮無畝以耕眷餘緒之尚抽
兮慨慈親以遲榮徐虛縮瑟以內習兮予寔愧乎先
民之心惚恍惻愴其不得已兮被命于九江之潯戴
皇天之休兮廩足以飽度白日之難兮誰察予情涵
涵兮北風怒浪兮滔天撫慈膝兮出門淚漣漣兮就
船事將有責兮死豈予之所畏蓋忠未足以盡報兮
孝未克以自信惟行止之坎坎兮適簡罪以冀生度
白日之難兮誰察予情蛟窟齒兮岸摧蜃矯首兮波
分妖鱗恠鬣曾莫識其名兮怒銜牙以相矚數將傾
而還復兮予委命乎上靈幸生全而就泊兮夜風止
而月吐曠上下之澄徹兮適縱觀乎琉璃之府北斗
揚光兮百恠潛伏岸芷露翠兮汀蘭放芬起予思之
無窮兮旣躡影以自慰又苦辭以招魂辭曰始凶終
吉魂兮歸來奚往而失

殤愁

氣氛氛兮隘如颺颺兮寧居慧言在耳兮疇能捨
諸異質沉壤兮委夫頑虛鴻鴈零飛兮若獨何趨蘭
茝早悴兮天孰與辜雄喙雌啼兮巢失佳鷁天地黯
黯兮風雨呼呼旄翩翩兮導衢夜冥冥兮永殊搏

有醕兮鼎有魚享弗享兮日月云徂

醉翁操

泠泠潺潺寒泉瀉雲間如彈醉翁洗心逃區寰自期
猿鶴俱閑情未闌日暮向深源異芳誰與攀忘還
同瓊樓玉闕歸去何年遺風餘思猶有猿吟鶴怨花
落溪邊蕭然鷓鴣語林中清園空山春又殘客懷文章
仙度曲響涓涓泛商回徵星斗寒

古思歸引

石季倫有其序而云其詞

昔人思歸兮宅林藪之邃深阻長隄而臨清渠兮
翳翳以交陰有觀閣池沼兮通泉溜而附欽峯蹇蹇

羽之翔集兮嘉魚樂而浮沉時則命宴於芳晨兮連
親戚與佳賓執樂而侍兮列秦趙之艷人管絃奏兮
歌悠揚而絕塵漿蘭桂兮着着珍左琴右書兮助為
娛而養真又期於不朽兮志傲然而陵雲孰能婆娑
於九列兮顧牽羈於繁文曲有絃而無辭兮述予懷
以自信申歌曰日轂馳兮老將至鏢外紛兮中系累
歸去來兮予之思放吾形兮聊逍遙以卒歲

補易水歌

燕雲悲兮易水愁壯士行兮專報仇車麟麟兮馬蕭
蕭客送發兮酌蘭椒擊筑兮喑咽歌變徵兮思以絕

易水愁兮燕雲悲四座傷兮皆素衣歌復羽兮慷慨
髮上指兮淚交揮又前爲歌曰風蕭蕭兮易水寒壯
士一去兮不復還

思嵩送劉推官赴幕府

我思嵩兮三十六峯之葱蒼雲霞卷舒兮紛五色而
爛朝陽渺群仙之不可見兮時有鸞鶴雙翔窮崖
斷壑兮飛泉吼怒春琳琅儼脩松與美竹兮碧離離
而低昂考周室之卜世兮顧八表爲中央天乃寵於
吾宋兮六陵相差而永藏惟傳祚之億萬兮豈八百
以爲之長引伊洛之二水兮聿通汴而注揚回黃流

於故道兮滅湍射而汪洋橫星橋於河漢兮紫闕峙
而焯煌列槐植之行杭秀兮歷五代而經唐承太平
之雨露兮幸不遭乎伐戕爲衆木之耆艾兮如羽蓋
之迭張慨離彼而適此兮亦出處之靡常旣寓情於
物表兮獨思嵩之未忘忽有客兮鼓楫言別我兮靈
羊將度庾嶺泂濤江涉淮沂汴入幕乎洛陽詞氣有
餘頓挫鏗鏘誠南士之穎出然未始離乎炎荒請陟
嵩而遠覽循今古而徜徉矯垂天之翼繫瓊瑤之章
於是被詔音登玉堂返眎乎羅浮朱明如棄魚目而
懷夜光也

王逢原哀詞

追騁歸兮故國之高丘與子之相遇兮聽其言而若
秋雍雍而肆兮嚴嚴而收樂我之心兮以遨以遊予
將娶兮于南州莫克從子兮翻自省以幽幽川陸兮
沉浮日月兮再周云子之長逝兮愴我之深憂子不
可見兮道將誰求彼蒼者天兮胡慘胡仇奪子之速
兮使不位於公侯雖窮德之特立兮弗與世以綢繆
嗟坎水之未盈兮竟何澤以休休瘖予之聲兮血予
之眸猶不足以止兮靈何在而薦羞惟永絕兮奈何
帳平昔兮悠悠

徐孺興哀詞

嗟乎孺興之不幸兮上有高堂白髮之慈親孝不克
以自信平兮魂將逝而復返目冥冥而莫勝兮顧天
命之予壯短業脩脩兮志與道配寂不少振兮遽沉
幽而終蹇蘭未芳兮先凋月將昇兮俄隕孺人囁囁
兮追話言之弗足夢悠悠兮魂去來而數入聲聲聲撫稚
子兮秋夜長暗明璫兮摧腕玉魂何知兮興予之哀
體與道化兮歲月徂而屢周情纏綿兮若俱往則已
矣詞不足以盡寄兮託餘思於江流

留君儀哀詞

南漳留定君儀才行之士也嘗有德於予今其卒矣故為之詞以哀之

懷伊人兮漳水之湄爰結好之初兮予方出乎陷穽之羈縻彼知予之橫罹兮眷瑩瑩而弗支氛侵侵而襲人兮子獨贈我以蘭芝芳芬芬而爽吾衷兮雖厄窮而弗疑言涓涓而洗吾耳兮寂塵聽而淒其炊嘉黍而納吾腹兮使朝則忘飢采薜荔為予之服兮慨前脩之可追脂吾車而秣吾馬兮造仙的之幽竒蕤甘溜而茗酌兮珍盤進乎離支唱則和兮迭指摘其醇醪同底于道兮遵聖渚為之歸聊容與以卒歲兮

曾弗察乎白駒之驚馳泊中吉而啓行兮觴桂漿以違離惕南北之緬邈兮蹇形影之頽衰歌激揚而再發兮淚浪浪以沾衣馬悲鳴而仰顧僕弛負以增欷行雲住而黯慘去鳥返而低迷歲聘介而一至兮孰敢為之後期幸再往而再復兮釋予心之思也忽承訃以躑躅兮行不知其所之也嗟若人之蘊美兮天其奪之速也蹇松柏之枯折兮惡植則滋以榮也考大空之役物兮必善搏而化之也將為麟為鳳兮對明世而出也將為蘭為蓀兮芬馨香而薦上帝也將為江為河以濟舟也將為雨為露而澤物也將復為

人兮英華於士林也將為仙為神兮自適於逍遙之境也嗚呼以甚塞之懷兮測乎無涯之朕以有限之情兮導乎無窮之悲嗚呼其有知乎其無知乎吾其能久乎吾將從子於重泉之游乎吾又何詞之哀乎

山中樂 并序

歐陽公有山中樂三章送惠勤師歸杭後四十年勤師之孫元竦上人頗好吟詠從子遊且言思歸舊栖因擬山中樂一章以勸其歸其詞有同有不同亦各言其志也必有讀者能得之

歸乎樂哉山中之樂兮其樂無窮藹葱蒼蒼而杳嶺叢

兮眷青瑤之諸峯琉璃一碧兮湖波止而溶溶層樓相望曲徑相通魚龍轉影於汀瀾之際鍾梵苔響於煙雲之中鳥嚶日暖兮花氣濛濛寒密葉而成幄兮風颯颯而吹松巖谷玲瓏霜木落也玉宇浮空冰澌凝也天高月朗兮定省乎華嚴之境雷奔雨驟兮作新乎水墨之宮達僧擬王孫之葬圖法逸士林躡淵明之蹤方尔祖之得名兮考其言於廬陵之醉翁曰嗟世之人兮曷不歸來乎山中山中之樂不可見今子其往兮誰逢後四十年尔復好吟遠遊不反求我之從勸尔之歸兮拙老乎山中尔之材兮甚良當自

適其無庸之庸違世絕俗黜明塞聰山中之樂兮乃
可以久非我與尔兮誰同

石室遊

端城之北徑五六里有石室兮洞開其上則七山建
斗司天之喉舌其下則淵泉不流滄碧一杯窺之則
肌髮冰去聲酌之則煩心灰四傍則石乳玲瓏中敞圓
蓋窈窕萬丈莫窮其厓孰納忠兮嗟肺肝之已露孰
止戈兮束兵仗而相挨儼衛士之行列肅庭臣之序
排紛披披兮帶萼粲縱橫兮條枚安而不可動者為
梁為棟奔而不可止者為虎為豺龜闖首兮屏息虬

奮鱗兮搏雷恠恠竒竒兮千變萬態愈眎愈久兮惚
恍而驚猜何人境之俯近而仙宇之秘異如此者哉
蘿卷風兮窈窕春漬芳兮不迴或命佳客或寓幽懷
考二李之勁筆邕紳邕皆一時之遺材援玉琴以寫詠悵
夕陽之易頽方謝事以言返眷茲室而徘徊雲愀容
兮泱泱鳥送音兮悲哀况百年之將盡邈夫萬里奚
復來

逍遙園 井序

筠州之城西有園名曰逍遙因山而得名今鄒君幾
聖大夫之所有也予作逍遙園一首以贈幾聖云

逍遙有水一溪有竹三畝蘭芬菊芳松老石瘦堂居
其中亭列左右菲菲兮春榮陰陰兮夏茂孤猿嘯兮
秋夜長空桑擘兮冬雪畫山之名兮人莫知公為主
兮天所授其或要佳賓酌醇酎清吟得韻兮非人世
之絲篁屬筆成篇兮發天機之錦繡方且登高臺挹
遠岫俯仰群仙咨詢遐壽脫輪蹄之縈服煙霞之秀
於斯時也一舉九萬兮吾不知其爲用嗒焉自喪兮
吾不知其爲偶脩兮官兮非無之無寂兮息兮非有
之有無何亦何得而各有竅則竅遽能久至若聽出
于垣觀入于牖此鄙士之常習又安得與夫逍遙主
人而爲之友也哉

孤雲寄潘延之先生

望孤雲兮山之巔漉弗雨兮何油然送孤鴻兮海之
涘高舉翼兮遊無邊彼君子之如似兮脫世俗以不
返奚無悶而止兮又放意以窮年川有航兮陸有馬
園有佳木兮池有芳蓮坐卧兮白日笑歌兮朱絃客
至止兮樂我之樂豈公侯之下兮曾弗擇乎愚賢僕
夫以耕兮妾女以織恬弗愧兮我衣我食神仙之道
遙兮固不得以見之君子之宴息兮舉斯世以誰敵
嗟世人之自徇兮莫知其求勢得而傲兮勢失而囚

靡後先之思兮孰進退之由苟歲月之徙兮託冠帶以包羞惟勇子之從兮貧未足以自周匪妻子之累兮寔吾親之憂慨負重兮執執慕坦跣兮臨流

采薇山之巔贈張無夢先生

先生曰采薇山之巔兮吾非求爲之仙吾無一畝之宅一丘之田飢食山之薇渴飲山之泉巖爲吾居兮鹿爲吾馬吾豈不足兮翱翔乎山之間彼世俗之混混兮嗟苦短之白日此一身之悠悠兮聊自樂以窮年彼塵埃之荏苒兮此雲煙之綿聯誰謂才之大兮慨匠氏之弗取吾獨幸其弗取兮森葱蒼而自全粵吾君之爲治兮三王之聖而吾相之爲輔兮伊周之賢吾父吾母兮皆善終以天筭進何憂而退何憾兮養吾氣之浩然弟子進而贊曰采薇山之巔兮其樂也如此衣曳曳而情飄飄兮願執轡而往焉

青山集卷第八

青山集卷第九

當塗郭

祥正字功父

五言古詩三十九首

遊仙一十九首

漠漠出寒霧悠悠趨太清
珠樓被重綃靈花紛素馨
青衣捧綠章磨丹書姓名
為我橫玉笛一奏雌龍聲
非塵復非煙氤氳散紫清
乃知冷風御脩脩恣遊行
忽逢黃金闕去是玉帝京
逍遙侍御者不假精銳兵
扶桑并咸池宵宵殊在下
真陽涵素光無晝亦無夜
神體常自保不與物俱化
運齡從此長塵緣頓消謝

至道不由學類齡安可住宿命無纖罹重玄乃遐悟
鮮明女蘿君致我火澣布稽首存至誠欣會如所度
至音非樂音玲瓏聞自然殊絕洞房景亦超鬱蘿天
靈嬪下鶴馭問我來何緣却驚與世隔一別三千年
澡心華池液薰手玉樓香一披寶神經衆真共來翔
七言詠良遇至音迭琅琅珍重衛夫人行草記瑤章
太微無列風紫臺多靈露道遙三五客披衣縱高步
回首笑復歌遊此今幾度却嗟寰中人枉爲死所誤
仙家無四時瑤草常芬芳五嶽倏來爾玉鞭驅鳳凰
得道迭相度不聞嫉賢良所以心無邪人人自年長

妙景素無雜玉界涵虛明妙聲清不滯洞歌奏金鈴
真遇非遐想忘心乃全生噫哉百年內得失安足營
峩峩金精巾飄飄清霞裙手持紫毛節身乘三素雲
駕言欲何適上朝玉晨君隱書謝所賜洞明道之根
脩然乘一氣來往遊太空閑歌內景章遂登藥珠宮
華英不知名激齒甘液濃此樂無憂覺固非侯與公
投真落人世倏經四九年覩紛未嘗競內顧淨且淵
果逢飛行羽得披紫微仙携手浮絳波絳波春渺然
攀泐日月窟遂觀天地樞搗金鑄豪英搏糟醞庸愚
校量宿所造報應無差銖丁寧與世言安分勿浪圖

在天不擇友天人皆正一雲漢共翱翔隱耀無固必
豈同濁世遊自謂膠投漆毫端利害分白眼永相失
歎逢九華妃授我磨鏡石一磨日月朗萬古永不蝕
緘之紫錦囊匪同趙氏璧纔落猛士手睨柱曾莫惜
二景結良匹曾非塵慮侵欣欣啓皓齒玉珮揚清音
碧河并絳實探濯期追尋言舒意亦散雙好永齊心
神凝光自生洞房玄照映青絲散垂腰目采流玉鏡
共談上清事精微寄餘詠樂酣會旣分雙駕還霄嶺
清僚真可慕振衣願所歸旣絕世上緣吾寧抱愁悲
雲韶自相諧虛聽方達微是將跨靈羽逸麟復攀追

窺天見天根步玄入玄門素光流一氣默默復渾渾
揮手散餘景至心揖靈尊從今乃忘言大道多子孫

春日獨酌一十首

桃花不解飲向我如情親迎風更低昂狂殺對酒人
桃無十日花人無百歲身竟須醒復醉不負花上春
江草綠未齊林花飛已亂霽景殊可樂陰雲幸飄散
且致百斛酒醉倒落花畔

平生最嗜酒況復就花飲明月正照人吳姬安得寢
更起盡餘盃擊碎珊瑚枕

芳華無十日自勸頻舉盃素髮易凋落青春難再來

林間黃鳥轉日下浮雲開吳歌梁塵飛越舞白雪回
英雄既長往珠金安在哉僅存一丘土石麟卧蒿萊
誰曾將濁酒爲君傾夜臺

醉去卧蘭芷安用張蜀錦何必黃金盃瘿杓亦足飲
物理不可齊好惡乃天稟直精既洞達空無仍諦審
所以陶淵明北窻自歌枕起作無絃彈此音殊妙甚
雷聲散陽氣晴景醉長天綠從何處來染我山下泉
汲泉釀醇酒舉盃復頽然寄謝伯夷輩餓名安用傳
春日何遲遲萬物涵陽暉君看源上桃並蒂花滿枝
雙雙梁間燕營巢知所歸凌霄附長松託根亦有依

餘生如不飲無以謝芳菲

不羞雙鬢雪折花向林間念此光景速未能身世閑
滿酌金罍斗遙望謝公山跡欲扁舟渡心先高鳥還
今朝不酩酊何以破愁顏

幾日待春光春光易衰歇流年信密移誰能保肌髮
何須秉蠟炬今夕值明月但願海變酒拍浮長出沒
歸來歸去來蓬山有仙闕

海棠微雨濕枝上殘紅泣山鳥啼向人春光一何急
濁酒注我腸免使新愁入却欲買扁舟漁竿荷蓑笠

田家四時

田田時雨足鞭牛務深耕選種隨土宜播擲糝與杭
條桑去蠹枝柔柔待春榮春事不可緩春鳥亦已鳴
麻麥聞熟刈蠶成繰莫遲更看田中禾莨莠時去之
幸此赤日長農事豈敢違願言一歲稔不受三冬飢
開塍放餘水經霜穀將實更犁原上疇坎麥亦去畢
老叟呼兒童敲林收橡栗乃知田家勤卒歲無閑日
田事今去休官輸亦已足刈禾既盈困採薪又盈屋
牛羊各蕃衍御冬多旨蓄何以介眉壽雍中酒新熟

朝登北山頭二首

朝登北山頭千里入平望本欲寄吾懷胡爲返惆悵

晴雲隨白日西去沒青嶂素絲行滿頭吾年安可壯
朝登北山頭悠悠望江水水流無還期人老行已矣
勸君把一樽聊用置悲喜生無死何有原終乃知始

感春二首

高枝花自舞低枝花自笑上有濃露濯下有清溪照
開落十日間誰識春工妙一杯亦頽然獨醒時所誚
盎盎酒盃綠披披花萼笑雖無同心客幸有白日照
趨時性已拙悲歌聲不妙素髮未能歸猿鳥應相誚

同阮時中秀才食筍二首

蒼崖長龍孫頭角露已甚呼丁恣庖割移榻就濃蔭

况疑羽林槍羅列在紫禁餘鞭橫瘦地密籜若紉紅
亭亭風勢勺節節泉脉沁藩垣謹藏護寧使暴客闖
烹調衆云美剪伐吾亦任繞齒嚼冰嘶毛髮寒以禁
閑心本猿鳥世味嗟毒鳩野逸誰所憐愁思腸胃滲
詩才君獨勇辨舌予久噤酒行且莫辭醉膽滄溟浸
况逢堯舜治面內來左衽熙熙冠蓋遊落落飽食飲
鸞鳳自橫飛燕雀蒙廣蔭徘徊食筍謠明發扁舟賃
予生本無羈繆爲茲縣尹日長公事餘佳客車接軫
入林安所食烹庖就肥筍森森蒼龍孫頭角遭束窘
金刀僕爭割紫籜手親墮草火尤相宜狼藉亦殘忍
予腹旣便便從君覓而哂

青山集卷第九

聊爲一餉樂得酒輒滿引喧呼甚屢勝慘淡詩不敏

青山集卷第十

當塗郭

祥正字功父

和李白詩四十三首

追和李白姑熟十詠

姑熟溪

源從丹湖來奔流朝北極雙橋跨長虹千艘濟民食
日華動清曉岸柳搖行色文王未出獵垂竿人莫識

丹陽湖

湖光際長天永日微風止菱歌一舟去雪陣群鷗起
荷香迷近遠秋色瑩表裏試問賀季真何如鏡湖水

謝公宅

山冢存廢址昔是玄暉宅林藏幽鳥聲月弄野棠白
高賢百年盡遺事千古積此興欲誰論摩挲問磐石
凌歊臺

高臺築千尋勝景供遠目雲煙護城郭吳楚接川陸
不知歌舞散雌鳳叫空竹鬼火照殘碑應有精靈讀

栢公井

環營鑿九井井深泉不竭舊甃缺瓊瑤新苔荒歲月
重吟太白題興自栢公發我欲喚常娥團圓伴澄澈

慈姥竹

一種碧琅玕攢根繞蒼島濃陰不透日密幄得春早
笙隨緱氏仙鈞入蟠溪好欲識化龍虵唯應雪霜保

望夫山

登高望天涯化石與君別秋鬢霜露深春衫薜蘿發
旅鴈只空飛悲煙長不絕行客歸去來芳心可休歇
牛渚磯

長江瀉危磯雷怒安可向煙雲忽藏月鯨鯢互噴浪
朱衣叱犀火丹青豈能狀引盃聊醉吟徑卧巨鼇上

靈墟山

仙人赴金闕靈墟躡高路空見白雲飛想乘黃鶴去

月冷步虛壇
苔深煉丹處
塵寰欲何爲
光陰等閑度

天門山

巨靈擘蒼山
勢分金闕對
月引曉嵐交
江翻寒影碎
雙鳧落人間
千帆出天外
我欲往高吟
凌虛踏煙靄

追和李白秋浦歌十七首

碧水碧如淀
染成秋浦愁
長橋通驛道
危堞起朱樓
蕩槳誰家女
菱歌自風流
江心雪浪湧
知解渡江不
却羨雲中鴈
低飛過北州

此夕宿秋浦
蕭蕭古岸頭
白雲和月散
江水暗空流
不及水中鳥
隨波上下遊
客情須自遣
知命適虛舟

水晚舟楫止
山寒猿狖稀
雖憐秋浦好
未敢濯征衣
霜落荻洲晚
水殘魚市衰
唯逢採荷女
素手理輕絲
莫聽猿夜啼
莫看蘆花雪
倦客多少愁
離家八九月
水有錦駝鳥
山多杜宇花
扁舟投夜泊
來自長風沙
秋水適淋漓
寧分馬與牛
酒樓翻擅價
不當白狐裘
秋浦試北望
參天九峯竒
綠何謫仙客
名作碧蓮枝
萬丈水車嶺
還如九疊屏
北風來不斷
六月亦冰生
捨檝乘藍輦
十里穿松林
悲風西北至
千千龍鳳吟
史君如杜牧
方有愛山心
齊山一百洞
咫尺接危梁
雨過頻登望
逼人松檜香

清溪十里岸蘆花八月天不惜錦袍濕應須擢釣舩
秋浦勝姑熟白鷗無數飛謫仙如得句須換一雙歸
老謝奪秋景橫卷披雲煙寓目不知遠何須家朝川
鏡潭弄秋月始知秋興長金龜能換酒客鬢不嫌霜
半空紫微亭翫月動經宿更待雨中來林林看銀竹
秋浦一何好名因太白聞溪山圍市井鼓角下煙雲
追和李白登金陵鳳凰臺二首
采鳳何年此地遊高臺千古自風流寒煙淡淡籠城
郭寶器時時出塚丘舩舩競歸芳草渡鷺鷥群舞碧
蘆洲重華不返簫韶斷落日秦淮添客愁

高臺不見鳳凰遊望望青天入海流舞罷翠娥同去
國戰殘白骨尚盈丘風搖落日催行櫂潮卷新沙換
故洲結綺臨春無覓處年年芳草向人愁

舟次新林先寄府尹安中尚書用李白

寄楊江寧韻 二首

金陵龍虎國况與王謝期掛帆須一往願借天風吹
昔解徐孺榻別來勞夢思鍾峯當北戶浮玉出東池
柳青白下門鷺棲瓊樹枝但對樽中物何嗟鏡裏絲
如聞紫泥詔起公翊明時霈爲天下霖一洗早曠悲
請歌甘棠歌翻作新林詩

休居尚蒙祿願赴興龍期况此孱病姿感公久嘘吹
相望止百里株坐徒傾思呼僮刷鶴羽駕言別清池
往將投新林新林有高枝仰聽鸞鳳音軋軋如抽絲
窮陰欲雪天鸞雀無聲時接物伸妙理運心廣真悲
如何持一盃要我百篇詩

舟次白鷺洲再寄安中尚書用李白寄揚

江寧韻二首

白鷺飛還集新沙沒故洲山形龍晦角江氣蜃為樓
欲問前朝事空懷去國憂鍾聲萬家曉霜葉半城秋
化值唐虞盛人逢王謝流徐生思解榻兵醞可銷愁

終朝蕩雙槳夜泊碧蘆洲重城已在望聞公宴層樓
華燈燦繁星浩歌正忘憂賓朋集珠履佳節臨千秋
謂近興龍節願言刷微羽一飲清泠流舉目送高鳳簫韶洗
民愁

奉同安中尚書用李白留別王嵩韻送毛

正仲大夫移浙漕

春岸草回綠春江日浮金蘭舟忽言發芥蒂悲我心
藹藹松栢友雍雍鸞鳳吟願同三歲遙毋使離別侵
奈何千丈材亭亭不依林眷為九重知移節宣德音
遂令帝王澤深於太湖深豈同失群鶴飲啄憐空岑

誰將勞勞歌一瀉無淫琴

將遊宣城先寄賈太守侍御用李白寄崔侍御韻

峩峩敬亭山玄暉有佳作賈公乃後身風流今與昨
豸冠觸姦邪分符宛陵郭江湖暫徘徊煙霄必騰躍
予方卧閑雲時或乘皓鶴水縮龍蜃歸霜清天宇廓
安能坐隴畝淒淒眷蒸藿陳蕃有虛榻黃埃侵斷索
能如汲黯直定許季生諾往哉不可失行聞還鳳閣

追和李白宣州清溪

清溪安在哉欲弄清溪水更邀琴高生携竿會於此
日落翠屏間雞鳴桃花裏不見避秦人誰嗟遠遊子
留別陳元輿待制用李白贈友人韻

沉吟澗底松不及堯階草不經君王顧枉被風霜老
弱羽戀一枝敢思浴天池聞君有餘力何惜一嘘吹
青雲與黃壤回首隔追隨

留別宣守賈侍御用李白贈趙悅韻

賈誼幾世孫閑邪誠所存一登御史府直氣壯中原
五載三去國士論皆騰喧浩養固無害宣城况名藩
下車究積弊摘節仍除根乃遷孔子學方庭樹蘭蓀
講解得董生思覃先聖恩軒軒慕高第各各不窺園

修橋濟行邁掩骼招旅魂蕭蕭囹圄空清風時掃門
尋山出近郭玉舩紅浪翻誰為坐上客能酬謝公言
自愧翅翎短謬參鴻與鷓不有瓦礫賤那知圭璧尊
矧叨半面雅歲久情愈敦三章寵新作詞源何駿奔
幾欲效長吉微吟謝高軒霜威信凜冽即之自溫溫
又如太古鏡磨開蒼蘚昏肝膽悉照徹魑魅安敢論
行聞紫泥詔沙路馳歸轅豈容隱巖子留連愛石盆
看君揚天翼北溟終化鷗而我隨白鳥丹湖往孤鶩
遷客昔登覽愁煙頰四隅身趨夜郎道心戀咸陽都
便欲凌風去酣歌與君俱

題化城寺新公清風亭用李白元韻

唐時升老亭剪棘今重開南瞻峨眉闕北峙凌歊臺
新公將家子為僧亦多才譬彼獨鶴唳安用群雞猜
或彈玉軫琴傾耳濯纈埃清風不知處冷冽時時來
吹雲雲窈窕吹月月徘徊幽人許共賞渴心咀瓊梅
了然得真味塵魔自崩摧令妖又豪俊書名駭奔雷
其姓冲雅善草禪談屢終夕茗酌無餘盃還歌太白篇
書名重天下

事往良可哀古今儻同轍浩氣不寒灰

太守陳侯見要登黃山送馬東玉遂用李
白登黃山送族弟濟赴華陰韻呈陳侯并

送東玉

穎川賢丈夫虛懷蘊虹霓雖分銅虎符合在帝苑樓
邀我登黃山攀雲絕長梯霜林正搖落寒鳥鳴慘悽
金牛飲空渚天鏡開峨眉塵埋宋武妓薛剝開元碑
謫仙送客處塊斷白日低松梢想獨鶴軒昂避群雞
還思北溟釣赤脚踏鯤鯢時窮壯士耻思遠騷人悲
且舉一盃酒肯分雲與泥坐有北歸客張帆震雷聲
往獻白玉璞不憐紅粉啼薦章已交達高名動朝闈

君相必見收煙霄速橫飛盃停可以起看君開羽儀

盛仲舉秀才歸自九華極談勝賞亟取李

白九華聯句元韻作二首誌之

客從青陽歸爲我談九華雪潭昨夜宿衣上有殘霞
鳴溜隔深木白鷗栖翠崖南遊豈是遠乘興必携家
昔號九仙子今名九蓮華差差浮碧海葉葉散晴霞
積靄迷金寺飛流濺雪崖開簾陪岸幘須覓夏侯家

青山集卷第十

青山集卷第十一

當塗郭

祥正字功父

五字古詩三十首

望九華山寄夏公酉

扁舟沂南江群山漸秀發遙瞻九華峯點點出天末
迤邐見雄竒平地犀尖拔夕陽凝紫煙仙簪聚鷗髮
又疑碧蓮花倒插黃金闕想像終未工靈襟謾超越
矧彼山中人了與塵事絕採秀旣忘年道授飛仙說
世間名任高物外緣皆滅百憂眷薄祿我輩志已屑
趨榮羞捷途就卑老剛節雅知名山樂勇往胡未決

此興待君論青衫可借裂

感懷贈鄂守李公擇

君顏削寒冰君心抱堅玉自甘正諫黜不受公議辱
請言會面初遭艱守窮屋屋臨脩水陽蓬門入深竹
伯季止三人群書聚頭讀野夫學孟郊苦吟中夜哭
公達學伊尹經濟飽曾腹君乃學楊雄草玄明倚伏
遂兼孔氏易極變悟神速亭亭出林材濯春千丈綠
我願從之遊旦暮同飲餼忠規日有益文彩觀郁郁
不肖俄遭讒逃形入空谷諸君釋服起爲貧苟微祿
君來宣城幕衆謂得杜牧我適遊昭亭林中騎白鹿

時趨資深堂遇君亦休沐飲酣河漢低談高鬼神肅
出處二三年於焉失羈束一別幾何時離群念幽獨
野夫今郎官佐郡馳朱轂公達遽不幸高名收鬼錄
君昔居諫省上方容啓沃忽分江夏符善教蘇弊俗
衆飢發倉賑賣丁與金贖載歌竒章公間運始來復
顧我最飄零塵網自投足遐趨僻小郡勢若羝羊觸
道出賢侯藩菁莪聞樂育况當異夷鶴樓晴江春撲撲
美人卷紅綃笛奏梅花曲龍行水底吟雲在山頭宿
酩酊安敢辭念此齡運促君名方顯顯我困已碌碌
一爲涸轍魚一作秋空鵠愁來如江河箕箒障不可築

聊書感懷篇淚下遂盈掬

采石峨眉亭登覽贈翰林張唐公

巨舟發長溪簫鼓奏雲漢史君領賓從險絕窮壯觀
逶迤轉滄洲稍泊大江岸前登千丈峯萬里瞰瀛漫
峨眉聳雙碧斬斬天塹斷誰驅六龍轡事逐孤煙散
如聞限南北謬彼曹公嘆寧知真人興遐徼服輝煥
僭王苟餘息窘束若鼠竄虹蜺渡戈甲雷雨洗屯難
石根有遺跡俛首想神筭承平逾百年鍼砭決癰疽
幸茲國老賢州事無留斷披榛構危亭突兀出天半
樂成須吾曹嘯詠爭璀璨天空織靄沒川動日華亂

群鷗或飛舞縞練遺片段歸鯨鯨擺漁火星點爍
靈犀安用燬神理幽可贊翻思素謝輩道貴一以貫
遇古名空傳逢今歲非宴我公神采瑩皎皎白玉瓊
言詞珠貝擲肝腎錦繡爛平生存至誠許與比象豕
况當仙府間長謠愈華奐原原無根涯天馬脫羈絆
顧予亦何人勇和不知悞譬彼禽之雛歛翼自投彈
飲闌記名姓會稽妙揮翰滑磨青瑤碑八法素常按
點畫猶生成霜池聚鴻鴈千載期弗訛鑿賞永傳玩
盛事難再并月上歸興道

贈泗守宋子堅

憶昔始相遇諫院吳侯家君顏清且少皓雪敷瓊花
把酒聽高談正氣橫鎮鄒倏別二十載各在天一涯
君去登朝聞我方浮海槎進退自殊轍音塵空鴈駕
却來淮上守政聲被幽遐填德在風俗餘春散禾麻
斤斤梁棟材葱蒼蟄龍蛇匠石未迴首電電無傾斜
而我造賓榻蓬鬢吹塵沙歡言問往事念此歲月賒
開館使休息投文誤矜誇伯樂雖一顧慙非真渥洼
功名業已晚世路今仍差獨醒既不容混迹良可嗟
清江秀山水白酒浮月華深犁熟稔稻淺釣多魚鰕
長為避俗翁不落猛虎牙願言雖未諧行矣君及瓜

贈元龍圖子發 時左官宣城

明公有盛名十年懷慕向昨聞守桂林清風掃蠻瘴
否來偶遷謫暫泊宛溪上斯事公議存君命詎惆悵
坐局顧申卯自忘曾帥將公餘領兒孫時時入重嶂
遇勝寄幽懷覽古興絕唱况逢謫御史文章号宗匠
賚酬曷金玉側耳聽響亮神交付逍遙外物隨得喪
漢庭憂乏才賈誼豈終放未即登金鑿行須復牙帳
矧公飽經術義足明霸王推忠結聖主大業繼賢相
霈成三日霖一慰天下望微生實幸會漫刺詣高閣
塵埃蒙弊裘何以異罔象屏詘誠所宜獎與若為當

逢知信有時報德亦非妄且陪昭亭遊昭亭春盎盎

贈夏公酉寺丞

秋浦明似鏡九華碧參天秀色動南斗乃生名世賢
卓越夏夫子其才文武全一覽無復遺萬卷能口傳
奏書黃金闕坐可安二邊功名初自許世路多迴還
亭亭出林幹暴為狂風纏乘槎往滄海怒濤觀大川
還聞上南嶽闊步從飛仙解衣祝融峯濯足天池淵
下視白日沒九州渺蒼煙傾壘吊屈賈汝道吾未然
胡為奪浩氣慘淡趨重泉具心想太古妙理追溥源
白雲起歸興却泛千丈船少泊姑溪頭春林聽杜鵑

謝李迹已往高風在遺編浮魂試一招相望誰後先
伊余亦何人謬拍洪崖肩放身逍遙鄉致主知何緣
斯時方泰熙薰風播朱絃竒才森大庭拔茅茹相連
豈聞卞氏璧指以微瑕捐願取雕倉君徒投北首可懸
嘆息比不足浩歌成此篇

贈二李居士

伯時德素

二子跨黃犢尋春造龍眠身披五雲裘翠髮散垂肩
群兒漫相逐不識南昌仙我往一長揖問我聊停鞭
深林藉草坐對酌臨潺湲琅琅聽險語了了出愛纏
月殿折芳桂高名金榜懸掉頭不回顧息迹趨溥源

窮幽採紫芝長嘯呼青猿使我慕高節神魄方森然
言歸恨不早白雪羞盈顛於時業無補碌碌隨冗員
交趾近反逆蟻聚浮戰船邕廉皆失守聖主憂南邊
上將命達高眷筭天所傳虎羆十萬衆干戈與雲連
傾海洗梟巢拓境除狼煙悵懷炎瘴地何日聞凱旋
北虜恃驕黠分疆亦逾年廟謨非不深遣使皆俊賢
此事竟未果艱虞甚防川安得傳介子萬里威名宣
不然隨隱淪漁釣求深淵出處兩齟齬悲歌寫哀絃
二子顧我笑汝心殊未堅浩氣本空潔胡爲自鏡鑄
請駕逍遙車共遊方廣田飢餐種成玉渴飲華池泉

我命永不滅是身猶蛻蟬世紛速辭謝來續清淨緣

贈樂嶽山人

樂老出三峽騎驢訪名山一見五老峯笑傲遂忘還
蕭蕭太古松徙倚青崖間泉石託生計雲霞會追攀
我寧求世人世人非我閑鍊氣得真惠神針起疵癢
何時駕皓鶴定應出塵寰王母如問僕爲謝今鈍頑

贈辨才宗衍大師

開帆出長淮泊舟近禪刹仰瞻翠雲塔俯壓神物穴
衍語如懸河事從古先說欣聞佛力聖降魔未嘗殺
爾來居幾年戒履皎霜雪領徒三百人晝飯天厨設

重重殿閣陰清爽無六月固知出世緣了與俗士別
此生猶孤蓬驚風畏飄瞥長林宿鳥盡而我歸路絕
出處既不同淨社無由結三嘆復何言踈鍾雲外滅

贈圓通訥禪師

禪師古豪英識之已恨晚浩氣雖自充靈標固天產
瓊枝玉府秀春波鏡湖滿妙趣玄中玄高談簡復簡
痊予萬古病金刀刮昏眼朗如秋月明不害浮雲生
始知金僊教六幽同一情一情亦何有紛紛逐妍醜
遂令世上人浮沉嗟白首我願卿相知薦師爲國師
一言了萬化堯舜誠無爲逢時揚至道曠劫開群迷
儒佛實皆聖胡爲相是非本亡末愈弱行偽言空持
嗚呼可柰何師也予同歸

贈端禪師

十年不變舊交深情愈淡世樂貽真羞去若出窰陷
故林泉石新悠然在虛鑑寂寂夜香沉無心苔鍾梵

贈隱靜觀禪師

平生厭羈束樂爲名山遊五峯數千仞拔地凌斗牛
山光落澗影倒掛天河流靈草霧露香老木陰翳稠
鳥鳴春盎盎虎嘯風颺颺耳目兩以醒虛襟清氣浮
况有希世交居焉洽林丘玄談傾醍醐蕩滌方寸愁

出沒死生際日用誠吾由應嗟世俗士俛首窺王侯
百年聊汨汨外物終何求我將脫冠帶築室東巖陬
長年丐香飯師也能容不

贈利安禪伯

名山多隱者五峯遇僧安屹然高世姿眉目冰雪寒
極談了無迹卷舌回驚湍令我愧道心齷齪滯小官
不能與斯人物外振羽翰惜爲山下別落月在林端

贈陳鑿

吾嘗竒華佗腸胃真割割神膏旣傳之頃刻活殘朽
昔聞今則信絕技世嘗有堂堂穎川客察脉極淵藪

孿兄四五年下針使之走珍丸起病瘠虫鱗隨泄嘔
一言儻不合萬金莫可誘又復能賦詩往往吐瓊玖
卷紙誇速成語恠若神授名聲動京洛混迹逐葭莠
相逢但長嘯遇飲輒掩口獨醒竟何如無乃寡俗偶
顧非避世翁疑是壁中叟安得斯人術付之經國手
寄常執中長官棄官歸雲上

高飛不上雲不如棲白蘋屈身五斗粟何似種松筠
聞君將掛冠築室茗溪濱况有朱少翁達論可相親
欹枕待落月尋花送餘春市喧不入耳休羨桃源人
我亦促歸計行當趨後塵

寄清流許令 升卿

雲溪皎寒玉 雪山卧蒼龍 我方窮眺覽 忽與旌陽逢
教告非俗語 泠泠啓昏蒙 我歸騎蹇驢 君去跨冥鴻
一別十五載 曠懷渴清風 今聞佩縣印 高鳳潛衰蓬
誰信五彩爛 卑栖能自容 終當振羽翮 萬里滄溟東

寄虔州慈雲惠禪師

惟昔廬山舊 舜師稱老禪 惠也乃上足 解空無比肩
我嘗叩其說 活活如湧泉 况復能吟哦 俯視唐皎然
一別二十載 相望脩途邇 音信誰謂隔 月華長自圓
嗟予困俗累 以負香火緣 適為幕府客 遠泛瀟湘船

還過廬山下 廬山安足憐 既無故人語 頑碧徒參天
多謝子規鳥 數聲空谷傳 准擬趁汝飛 飛落贛水邊
蔣穎叔要予同賦平雲閣

宣城多名山 詩人舊經歷 獨無平雲篇 疑怯作者敵
不然靈祇護 晦此神女色 留與無心人 開軒初占得
群奔萬馬放 片隨孤鷹擊 縷縷蟻繭抽 縱縱羽林直
恍隨片月散 又逐嵐光滴 縞帶裁未成 蛟綃瑩無隔
蒼君龍奮脩 鱗皓鶴舒春翼 天墀聳群玉 胡陣望鳴鏑
尤憐欲雪時 鐵甲萬重黑 變化固無窮 想像豈盡識
賢哉謫御史 注目倚寒壁 吟非宋玉賦 心在漢皇席

愁來把樽酒薄詠繼朝夕迷魂招屈賈大白
初屯念經綸作解須霹靂終期去爲霖未信長抱石
卷舒能及時慰此長太息詩言我枯踈返類群兒劇
君探驪頷珠不憚海神惜更當俟來唱研盡廷圭墨

寄題陳生九華閣

潁川有佳士放懷慕清閑或遊公侯門得詩乃言還
蕭洒青松姿俗駕何由攀買田數百畝家住濡須灣
匣有雷張琴旋撥春醅綠客來留一醉聽我彈數曲
收身趣已遠愛山心未足千金建危閣遙望九華峯
紫光射晚日點點金芙蓉南風吹秀色半落樽罍中

酒味愈冷冽琴聲又玲瓏飄然紫霄想何日跨冥鴻

寄題東城耿天隲歸潔堂

東城耿天隲讀書五千卷有義或未通至忘寢與膳
潛心唯丘軻弟子並時彥晚從進士起青衫落銓選
捕賊偶註誤差池因州縣寧知賈馬才不上明光殿
功名旣無成祿廩豈足戀歸來潔其身舊學進吾善
桂堂剪深竹江山使對面秀色覽天鏡毛髮瑩可見
閑情寄浮雲零落兩三片頽然墮支體隱几自峨弁
有時明月來朋簪合清醺狂爲梁甫吟璀璨珠玉串
夫人無妬忌群妾美目眇大兒富文學又隨太守薦

百口不憂貧九品不為賤內足外亦足此樂信無倦
軒冕達士寄形色聖人踐他時采高名猶冠儒林傳
寄題吳子山孤雲亭

重華不可見曾參以為塵孝道遂零落為子吟孤雲
孤雲泊南山山下藏二親孤雲自朝夕墳草幾冬春
悠悠我之思孤雲浩無垠注視詎能攬傾耳那得聞
音容勞夢想涕淚濡衣巾作亭墳之隅奚止簠簋陳
揚名與行道勉勉期終身采彼孤雲篇為子書且諸紳

題冶父山實際禪院

虎兮弗食子誰謂虎性惡一見慈孝人帖身不敢縛

舊廬當絕巔今寺據幽壑人虎皆已非斷碑蒼蘚剥
題宣州天慶觀秋水閣

偶登秋水閣靜吟秋水篇初不辨牛馬河伯方欣然
及見北海若始驚大小懸大小不相借致令憂愛玄
學者僮悟此心忘真乃全白雲散林表蒼山落簷前
中有醉道士兀兀知何年寒風洒面醒暖日曝背眠
彈琴不終曲撫掌望青天誰來達渠意勿作虛名傳

題旌德虞令觀妙庵

深溪徹寒鑑蒼山開翠屏結庵當此間觀妙題其高
借問觀何妙伊人養性靈豈為娛耳目是將達神明

滯有乃爲病趨無亦何營外感適變化中虛藏窅冥
夜深片月散林鳥三四聲寥寥太古風吹我襟嘗惺
逍遙形骸外浩蕩天地情未能同子樂聊用歌強名

題泗州龜山寺

蒼山如巨龜長淮就吞吐石林含霜明文卦儼可數
相傳有神物在昔遭聖禹繫鐵送潭中作鎮亘萬古
乾坤未云息魑魅那得侮至今崖下潭不敢設罔罟
邇來建佛廟金碧爛庭戶長廊肖深洞夜香鬱蔚濃霧
一讀碑上文颯爾精神聚憫旱截臂翁開山即初祖
供僧百萬人下壇三赤雨至尊親賜詩高名動寰宇

樓閣疑化成何年運斤斧洄流漲平沙舟楫永無阻
尤憐瞻仰地曾是歌傾所王者唯好仁佛力豈無補
我來解征鞍赫日正卓午涼風如冰霜洒我襟上土
仰慙雲衲禪未嘗倦行旅還思治水功冥冥今何許

題抱黃洞景德觀

觀有道士姓竺
三十年不出門

晉道昔紛亂志士多學仙乃願脫塵網畢身飛絳煙
卓彼抱黃子遺跡茲山巔地靈無惡木杉松碧叅天
四時不變春脩脩女蘿鮮下有白鹿卧上有青猿懸
微風五音奏不假朱絲絃來者迭宏構深門秘真筵
餘芳考金刻眇末期羗肩回念時運泰巖谷無逃賢

寓遊足以樂携壺謾思玄黃冠四五輩達者余所憐
未嘗詣州府白髮猶侵顛而况塵中人欲以永歲年
聊書一日事繼之逍遙篇

題雨華臺

仲庶龍圖新作於
梁雲公講臺之上

雲公說法時諸天雨名花此事古老傳豈爲虛語誇
至今數畝地長松肖龍蛇下不生蔓草上不存棲鷗
夜或散瑞光爛若赤城霞公崖僅可到狹徑寧容車
嚴嚴渤海公好古心無涯携筇徐步至極眺頻吁嗟
不唯古佛迹絕景來幽遐城郭如鉤環井廬雜禾麻
青山斷綠野白水連平沙翔帆出天鏡疊鼓傳摻搗

又復聽歸櫓大澤鳴鴈駕雲煙失浦淑霜雪摧蒹葭
顧瞻指掌間千里無毫差中天二龍飛此邦恃大手
納土業已緩何殊井中蛙神兵半夜集城裂如剖瓜
唯仁乃無敵四海同一家我公乘閑來式宴賓亦嘉
作亭當舊址海月浮牕紗舉杯莫辭酒越女彈琵琶
爲我謝雲公亦有三春葩真法忌揀擇豈校靜與譁
酩酊上馬歸鬢髮從紗紗

太平觀

下馬携瘦筇凌晨極幽賞騰身孤峯半縱目浮雲上
嚴嚴洞天路藹藹靈氣王古木藏春容飛流落天幌

斷崖傾鬱蘿深宮秘真像壇心綵虹貫幃脚仙颺颺
老鶴時一鳴衆鳥不敢傍人寰杳何處仕路險已忘
高歌樂道遙撫掌遺得喪長生豈無術靜理聊自放
獨醒世不容苟合情輒狂咄嗟胡爲乎茲焉卜長往

尋真觀

蒼崖猶積雪凍林春未歸石徑稍可通泱泱泉聲遲
薄遊欲何適携笻筇負陽暉覽勝輒長嘯世事吾何羈
忽到仙人家樓殿勢欲飛皓鶴向人舞青猿攀樹啼
屏風疊蒼玉深潭瑩瑠璃誰云蟄龍卧朗詠前人詩
颺颺太古風會生松桂枝回首歸興遙日暮青雲低

水磨

盤石琢深齒貫輪激清陂運動無晝夜柄任誰與持
霹靂駕飛雪盛夏移冬威功成給衆食勢轉隨圓機
翻思兵家言千仞俯可窺又想對明月大壑投珠璣
睥睨巧匠手不使差毫釐牛驢免穿領僮僕逃胼胝
利用固已博沉吟豈虛辭願將水磨篇薦之調鼎司

青山集卷第十一